

四庫全書

子部

欽定四庫全書

子部

朱子語類卷三十三

詳校官中書臣程炎

刑部郎中臣許兆椿覆勘

總校官中書臣朱鈐

校對官助教臣卜惟吉

謄錄監生臣許蔭培

欽定四庫全書

朱子語類卷三十三

論語十五

雍也篇四

齊一變至於魯章

問齊尚功利如何一變便能至魯曰功利變了便能至
魯魯只是大綱好然裏面遺闕處也多

淳

行父問齊一變至魯魯一變至道曰太公之封於齊也

舉賢而尚功孔子曰後世必有篡弑之臣周公治魯親親而尊尊孔子曰後世寔微矣齊自太公初封已自做得不大段好至後威公管仲出來乃大變亂拆壞一番魯雖是衰弱不振元舊底却不大段改換欲變齊則須先整理了已壞底了方始如魯方可以整頓起來這便隔了一重變魯只是扶衰振弱而已若論魯如左傳所載有許多不好事只是恰不曾被人拆壞恰似一間屋魯只如舊敝之屋其規模原在齊

則已經拆壞了這非獨是聖人要如此損益亦是道

理合當如此

賀孫

齊經小白法度盡壞今須一變方可至魯又一變方可
至道魯却不曾變壞但典章廢墜而已若得人以修
舉之則可以如王道盛時也

謨

齊一變至於魯是他功利俗深管仲稱伯齊法壞盡功
利自此盛然太公治齊尚功時便有些小氣象尚未
見得只被管仲大段壞了又云管仲非不尊周攘夷

如何不是王道只是功利駁雜其心耳

明作

語及齊一變至於魯因云齊生得桓公管仲出來它要九合諸侯一匡天下其勢必至變太公之法不變便做不得這事若聖人變時自有道理大抵聖賢變時只是興其滯補其弊而已如祖庸調變為彊騎長征之兵皆是變得不好了今日變時先變熙豐之政以復祖宗忠厚之意次變而復於三代也

植

問伊川謂齊自桓公之霸太公遺法變易盡矣魯猶存

周公之法制看來魯自桓公以來閨門無度三君見弑三家分裂公室昭公至於客死以至不視朔不朝聘與夫稅畝丘甲用田賦變亂如此豈得是周公法制猶存乎曰齊魯初來氣象已自不同看太公自是與周公別到桓公管仲出來又不能遵守齊之初政却全然變易了一向盡在功利上魯却只是放倒了畢竟先世之遺意尚存如哀公用田賦猶使人來問孔子他若以田賦為是更何暇問惟其知得前人底

是所以來問若桓公管仲却無這意思自道他底是
了一向做去不顧

問注謂施為緩急之序如何曰齊自伯政行其病多魯
則其事廢墜不舉耳齊則先須理會他許多病改了
方可及魯魯則修廢舉墜而已便可復周公之道問
孔子治齊則當於何處下手曰莫須先從風俗上理
會去然今相去遠亦不可細考但先儒多不信史記
所載太公伯禽報政事然細考來亦恐畧有此意但

傳者過耳廣

問集注云云曰不獨齊有緩急之序魯亦有緩急之序如齊功利之習所當變便是急處魯紀綱所當振便是急處或問功利之習為是經桓公管仲所以如此否曰太公合下便有這意思如舉賢而尚功可見

恪

問施為緩急之序如何曰齊變只至於魯魯變便可至道問如此則是齊變為緩而魯變為急否曰亦不必恁分如變齊則至魯在所急而至道在所緩至魯則

成箇樣子方就上出光采

淳

讀齊魯之變一章曰各有緩急如齊功利之習若不速
革而便欲行王化魯之不振若不與之整頓而却理
會其功利之習便是失其緩急之序如貢禹諫元帝
令節儉元帝自有這箇何待爾說此便是不先其所

急者也

時舉

問伊川曰夫子之時齊強魯弱云云呂氏曰齊政雖修
未能用禮魯兼周禮故至於道第二十三章凡八說

伊川
三說
今從伊川呂氏之說伊川第二說曰此只說風

俗以至於道觀之則不專指風俗乃論當時政治風俗固在其中然又別一節事又第三說曰言魯國雖衰而君臣父子之大倫猶在以魯觀之其大倫之不正久矣然禮記明堂位以魯為君臣未嘗相弑而注家譏其近誣則此說亦恐未穩橫渠謝游楊尹大抵同伊川故不錄范氏曰齊一變可使如魯之治時其意謂齊魯相若故以謂治時齊之氣象乃伯政魯近

王道不可疑其相若者魯秉周禮可見曰所疑范氏
說亦無病

韓

觚不觚章

古人之器多有觚如酒器便如今花瓶中間有八角者
木簡是界方而六面即漢所謂操觚之士者也今淮
上無紙亦用木寫字教小兒讀但却圓了所謂觚不
觚古人所以恁地方時緣是頓得穩

義剛

第二十四章凡六說

伊川兩說

今從尹氏之說尹氏乃合伊

川二說而為一說范呂楊氏說亦正伊川范氏謂不
合法制呂氏楊氏謂失其名其實一也失其制則失
其名可知矣謝氏是推說學者事

幹○無
答語

井有仁焉章

問可欺是繼可逝而言不可罔是繼不可陷而言否曰
也是如此但可逝不可陷是就這一事說可欺不可
罔是總說不特此事如此他事皆然

義
剛

叔器曰宰我只知有箇公共底道理却不知有義曰不

惟不曉義也不曉那智了若似他說却只是箇獸人
因云宰我見聖人之行聞聖人之言却尚有這般疑
是怎生地緣自前無人說這箇物事到夫子方說出
來所以時下都討頭不著似而今學者時便無這般
疑了叔器又云聖人只說下學不說上達所以學者
不曉曰這也無難曉處這未是說到那性命之微處
只是宰我鈍如子貢便是箇曉了通達底所以說從
那高遠處去

義剛

問伊川曰宰我問仁者好仁不避難雖告之以赴井為仁亦從之乎夫子謂不然君子可使之有往不可陷於不知可欺以其方不可罔以非其道呂氏曰井有仁焉猶言自投陷穽以施仁術也已已自陷仁術何施當是時也君子可往以思救不能自陷以求救可欺之以可救不可罔之使必救第二十五章凡七說

明道兩說

明道曰知井有仁者當下而從之否此說恐未

當君子雖不逆詐而事之是非曉然者未嘗不先見

也豈有仁者而在井乎雖有之君子不往也范氏亦
曰井有仁則將入井而從之蓋此意也其從之也只
合作從或者之言不宜作從井中之仁也謝氏謂宰
我疑仁者之用心觀宰我之言亦足以見其好仁之
切不宜深責之也楊氏謂宰我疑君子之不逆詐故
問觀宰我之意好仁之切以謂仁者好仁雖患難不
避故問非謂疑其不逆詐也尹氏用伊川說故不錄
范氏解逝字極未安與下句可欺也不類

謂君子見
不善可逝

而曰所論得之但此章文義諸先生說不甚明更詳
考之為佳幹

君子博學於文章

博學於文考究時自是頭項多到得行時却只是一句
所以為約若博學而不約之以禮安知不畔於道徒
知要約而不博學則所謂約者未知是與不是亦或
不能不畔於道也個

博文約禮就這上進去只管是長進蓋根脚已是了所

以不畔道

行夫問博文約禮曰博文條目多事事著去理會禮却只是一箇道理如視也是這箇禮聽也是這箇禮言也是這箇禮動也是這箇禮若博文而不約之以禮便是無歸宿處如讀書讀詩學易學春秋各自有一箇頭緒若只去許多條目上做工夫自家身已都無歸著便是離畔於道也

恪

問博學於文約之以禮曰禮是歸宿處凡講論問辯亦

只是要得箇正當道理而有所歸宿爾

錄

國秀問博文約禮曰如講明義理禮樂射御書數之類
一一著去理會學須博求盡這箇道理若是約則不
用得許多說話只守這一箇禮日用之間禮者便是
非禮者便不是

格

博文約禮聖門之要法博文所以驗諸事約禮所以體
諸身如此用工則博者可以擇中而居之不偏約者
可以應物而動皆有則如此則内外交相助而博不

至於汎濫無歸約不至於流遁失中矣

大雅

君子博學於文約之以禮聖人教人只是說箇大綱顏

子是就此上做得到深此處知說得淺

夔孫

問博學於文文謂詩書六藝之文否曰詩書六藝固文

之顯然者如眼前理會道理及於所為所行處審別

是否皆是

必大

只是博文約禮四字博文是多聞多見多讀及收拾將

來全無一事和敬字也沒安頓處

夔孫

博學亦非謂欲求異聞雜學方謂之博博之與約初學
且只須作兩途理會一面博學又自一面持敬守約
莫令兩下相靠作兩路進前用工塞斷中間莫令相
通將來成時便自有會通處若如此兩下用工成甚

次第

大雅

博文上欠工夫只管去約禮上求易得生煩

升卿

孔子之教人亦博學於文如何便約得

當

或問君子博學於文約之以禮曰此是古之學者常事

孔子教顏子亦只是如此且如行夏之時以下臨時如何做得須是平時曾理會來若非禮勿視等處方是約之以禮及他成功又自別有說處

大雅

博文工夫雖頭項多然於其中尋將去自然有箇約處聖人教人有序未有不先於博者孔門三千顏子固不須說只曾子子貢得聞一貫之誨謂其餘人不善學固可罪然夫子亦不叫來罵一頓教便省悟則夫子於門人告之亦不忠矣是夫子亦不善教人致使

宰我再求之徒後來狼狽也要之無此理只得且待
他事事理會得了方可就上面欠闕處告語之如子
貢亦不是許多時只教他多學使它枉做工夫直到
後來方傳以此秘妙正是待它多學之功到了可以
言此耳

必大

或問博學於文約之以禮亦可以弗畔與顏子所謂博
我以文約我以禮如何曰此只是一箇道理但功夫
有淺深耳若自此做功夫到深處則亦顏子矣

熹

問博學於文約之以禮與博我以文約我以禮固有淺深不同如孟子博學而詳說之將以反說約也似又一義如何曰論語中博約字是踐履兩字對說孟子中博約字皆主見而言且如學須要博既博學又詳說之所以如此者將以反說約也是如此後自然却說得約謂如博學詳說方有貫通處下句當看將以字若博學於文約之以禮與博我以文約我以禮聖人之言本無甚輕重但人所造自有淺深若只是博

學於文能約之以禮則可以弗畔於道雖是淺底及至顏子做到欲罷不能工夫亦只是這箇博文約禮如梓匠輪輿但能斲削者只是這斧斤規矩及至削鐻之神斲輪之妙者亦只是此斧斤規矩帶

問博文不約禮必至於汙漫如何曰博文而不約禮只是徒看得許多徒記得許多無歸宿處節○以下集注集義

問明道言博學於文而不約之以禮必至於汙漫所謂約之以禮者能守禮而由於規矩也未及知之也既

能守禮而由規矩謂之未及於知何也曰某亦不愛
如此說程子說博我以文約我以禮為已知不須將
知說亦可顏子亦只是這箇博文約禮但此說較粗
顏子所說又向上然都從這工夫做來學者只此兩
端既能博文又會約禮問約禮只是約其所博者否
曰亦不須如此說有所未知便廣其知須是博學學
既博又須當約禮到約禮更有何事所守在此理耳

寓

或問博學於文約之以禮亦可以弗畔曰博學是致知約禮則非徒知而已乃是踐履之實明道謂此一章與顏子說博文約禮處不同謂顏子約禮是知要恐此處偶見得未是約禮蓋非但知要而已也此兩處自不必分別

時舉

問伊川言博學於文約之以禮此言善人君子多識前言往行而能不犯非禮者爾非顏子所以學於孔子之謂也恐博文約禮只是一般未必有深淺曰某曉

他說不得恐記錄者之誤正叔曰此處須有淺深曰
畢竟博只是這博約只是這約文只是這文禮只是
這禮安得不同

文蔚

問橫渠謂博學於文只要得習坎心亨何也曰難處見
得事理透便處斷無疑行之又果決便是習坎心亨
凡事皆如此且以看文字一節論之見這說好見那
說又好如此說有礙如彼說又有礙便是險阻處到
這裏須討一路去方透便是習坎心亨

淳

博學於文又要得習坎心亨如應事接物之類皆是文
但以事理切磨講究自是心亨且如讀書每思索不
通處則翻來覆去倒橫直豎處處窒塞然其間須有
一路可通只此便是許多艱難險阻習之可以求通
通處便是亨也

謨

博學於文只是要習坎心亨不特有文義且如學這一
件物事未學時心裏不曉既學得了心下便通曉得
這一事若這一事曉不得於這一事上心便黑暗

問橫渠曰博文約禮由至著入至簡故可使不得畔而

去尹氏曰博學於文約之以禮亦可以弗畔達於道

第二十六章凡八說

伊川三說

今從橫渠尹氏之說明道

曰博學於文而不約之以禮必至於汗漫范氏亦曰

博學於文而不約之以禮猶農夫之無疆場也其不

入於異端邪說者鮮矣楊氏亦曰博學於文而不知

所以裁之則或畔矣此三說皆推不約禮之失謝氏

曰不由博而徑欲趨約者恐不免於邪遁也此則不

博文之失二者皆不可無偏舉則不可明道又曰所謂約之以禮者能守禮而由於規矩也伊川第一說曰博學而守禮第二說曰此言善人君子多識前言往行而能不犯非禮約字恐不宜作守字訓若作守禮則與博學成二事非博文則無以為約禮不約禮則博文為無用約禮云者但前之博而今約之使就於禮耳伊川之說文自文禮自禮更無一貫說看博約字與之以字有一貫意伊川又說顏子博約與此

不同亦似太過博文約禮本無不同始乎由是以入
德斯可以不畔終乎由是以成德欲罷而不能顏子
與此不同處只在弗畔與欲罷不能上博約本無異
伊川以顏子之約為知要以此章之約作約束之約
恐未安此約字亦合作知要伊川第三說與第一第
二說同但說大畧耳曰此說大槩多得之但此約字
與顏子所言約字皆合只作約束之意耳又看顏子
博我以文約我以禮既連著兩我字而此章之字亦

但指其人而言非指所學之文而言也

韓

子見南子章

諸先生皆以矢為陳否為否塞之否如此亦有甚意思
孔子見南子且當從古注說矢誓也或問若作誓說
何師生之間不相信如此曰只為下三句有似古人
誓言如左氏言所不與舅氏之說故有誓之氣象護
或問此章曰且依集註說蓋子路性直見子去見南子
心中以為不當見便不說夫子似乎發呪模樣夫子

大故激得來躁然夫子却不當如此古書如此等曉
不得處甚多古注亦云可疑祖道曰橫渠說以為予
所否厄者是天厭棄之此說如何曰大抵後來人講
經只為要道聖人必不如此須要委曲遷就做一箇
出路却不必如此橫渠論看詩教人平心易氣求之
到他說詩又却不然

祖道

問夫子欲見南子而子路不說何發於言辭之間如此
之驟曰這般所在難說如聖人須要見南子是如何

想當時亦無必皆見之理如衛靈公問陳也且可以款款與他說又却明日便行齊景公欲以季孟之間待之也且從容不妨明日又便行季桓子受女樂也且可以教他不得受明日又便行看聖人這般所在其去甚果不知於南子須欲見之到子路不說又費許多說話又如指誓只怕當時如這般去就自是時宜聖人既以為可見恐是道理必有合如此可與立未可與權吾人見未到聖人心下這般所在都難說

或問伊川以矢字訓陳如何曰怕不是如此若說陳須是煞鋪陳教分明今却只恁地直指數句而已程先生謂子所以否而不見用乃天厭斯道亦恐不如

此

賀孫

問子見南子曰此是聖人出格事而今莫要理會它向有人問尹彥明今有南子子亦見之乎曰不敢見曰聖人何為見之曰能磨不磷涅不緇則見之不妨變孫仕於其國有見其小君之禮當夫子時想是無人行所

以子路疑之若有人行時子路也不疑了孟子說仲尼不為已甚這樣處便見

義剛○夔孫錄云孟子說仲尼不為已甚說得好。

集注

問子所否者天厭之謂不合於禮不由於道則天實厭棄之曰何以謂不合於禮不由於道曰其見惡人聖人固謂在我者有可見之禮而彼之不善於我何與焉惟聖人道大德全方可為此曰今人出去仕宦遇一惡人亦須下門狀見之它自為惡何與我事此則

人皆能之何必孔子子善云此處當看聖人心聖人之見南子非為利祿計特以禮不可不見聖人本無

私意曰如此看也好

南升○植錄云先生難云子見南子既所謂合於禮由其道夫

人皆能何止夫子為然子善答云子見南子無一毫冀望之心他人則有此心矣曰看得好

第二十七章凡七說

伊川六說楊氏一說

今從謝氏之說伊川第

一說日子路以夫子之被強也故不說第二說日子路不說以孔子本欲見衛君行道反以非禮見迫竊謂夫人有見賓之禮孔子之見南子禮也子路非不

知也子路之不說非以其不當見特以其不足見耳
使其不當見夫子豈得而迫哉被強見迫恐未穩伊
川第三說曰孔子之見南子禮也子路不說故夫子
矢之第四說第六說同竊謂南子妾也無道也衛君
以為夫人孔子不得不見其辱多矣子路以其辱也
故不說夫子夫之曰使予之否塞至此者天厭之也
使天不與否則衛君將致敬盡禮豈敢使夫子以見
夫人之禮而見其無道之妾哉則子路不說之意蓋

以其辱夫子非以其禮不當見也使子路以南子之
不當見則更須再問何至坐視夫子之非禮雖不說
何益而夫子告之亦須別有說豈有彼以非禮問而
此獨以天厭告則夫子受非禮之名而不辭似不可
也蓋子路知其禮所當見特以其辱夫子也故不說
謝氏以為浼夫子之說極正伊川第四說設或人之
問曰子路不說孔子何以不告之曰是禮也而必曰
天厭之乎曰使孔子而得志則斯人何所容也楊氏

兩說亦然恐非聖人意聖人但傷道之否在於衛君不能致敬盡禮未必有欲正之之意恐成別添說伊川第五說穩但說大畧橫渠亦只說大畧范氏以矢為誓非聖人氣象呂氏大意亦通但以為使我不得見賢小君天厭乎道也此亦非聖人意合只作使我見無道之小君天厭乎吾道也却穩尹氏同伊川故不辨曰以文義求之當如范氏之說但諸公避呪誓之稱故以矢訓陳耳若猶未安且闕以俟他日韓

中庸之為德章

問中庸之為德其至矣乎曰中庸之中是指那無過不及底說如中庸曰君子之中庸也君子而時中時中便是那無過不及之中本章之意是如此又問中者天下之正道庸者天下之定理恐道是摠括之名理是道裏面又有許多條目如天道又有日月星辰陰陽寒暑之條理人道又有仁義禮智君臣父子之條理曰這二句緊要在正字與定字上蓋庸是箇常然

之理萬古萬世不可變易底中只是箇恰好道理為
是亘古今不可變易底故更著箇庸字

素

中庸之為德此處無過不及之意多庸是依本分不為
恠異之事堯舜孔子只是庸夷齊所為都不是庸了

樊
孫

問中庸之為德其至矣乎章曰只是不知理隨他偏長
處做將去謹愿者則小廉曲謹放縱者則跌蕩不羈
所以中庸說道之難明又說人莫不飲食鮮能知味

只為是不知植

問此章尹氏曰中庸天下之正理德合乎中庸可謂至矣人知擇乎中庸而不能晷月守也故曰民鮮久矣

右第二十八章凡七說

伊川兩說
楊氏三說

今從尹氏之說伊

川第一說說久字不出第二說雖盡而非本章意尹氏合而解之范氏說久字不出呂氏說寬謝氏曰中不可過是以謂之至德楊氏第三說亦曰出乎中則過未至則不及故惟中為至第一第二說同謝氏楊

氏之說皆以至字對過不及說謂無過不及則為至也過不及只對中庸說不可對至字說至字只輕說如曰其大矣乎不宜說太深楊氏第二第三說推說高明中庸處亦不能無疑侯氏說大畧曰當以伊川解為正中庸天下之正理也德合乎中庸可謂至矣自世教衰民不興於行鮮有中庸之德也自世教衰此四字正是說久字意謝楊皆以過不及對中字而以此中為至耳恐非如來說所疑也所破楊氏高明中

庸亦非是當更思之翰

子貢曰如有博施於民章

子貢問仁是就功用籠罩說孔子是就心上答可學

博施濟衆便喚做仁未得仁自是心端蒙

何事於仁猶言何待於仁必也聖乎連下句讀謙之錄云便見

得意思出雖堯舜之聖猶病其難徧德明

何事於仁猶言那裏更做那仁子問

問何事於仁先生以為恰似今日說何消得恁地一般

曰博施濟衆何消得更說仁

節

問何事於仁作何止於仁是如何曰只得作何止於仁
今人文字如此使者甚多何事亦如何為之意被子
貢說得博施濟衆高似於仁了故孔子言何為於仁
必也聖人乎堯舜其猶病諸是子貢問得不親切若
如子貢之說則天下之為仁者少矣一介之士無復
有為仁之理夫仁者已欲立而立人已欲達而達人
已才欲立便也立人已才欲達便也達人立是存立

處達則發用處於此純是天理更無些子私意便是
仁之體若能近取譬則私欲日消天理日見此為仁
之方也

南升

何事於仁只作豈但於仁當謂必也聖乎聖如堯舜其
尚有不足於此曰薛士龍論語解此亦是如此只是
渠遣得辭濫蓋仁以道理言聖以地位言自是不同
如博施濟衆為仁而利物愛人小小者亦謂之仁仁
是直看直上直下只一箇道理聖字便橫看有衆人

有賢人有聖人便有節次只豈但於仁蓋博施濟衆
雖聖如堯舜猶以為病耳備

問子貢問博施濟衆恐仁之極處與聖之功用本不可
分大小今言何止於仁則仁聖若有小大之分曰此
處不恁地讀必也聖乎語意未是煞處當急連下文
讀去仁以理言聖以事業言子貢所問博施濟衆必
有聖人之德有天子之位而後可以當此堯舜恁地
尚以為病仁本切已事大小都用得他問得空浪廣

不切已了却成踈闊似此看仁字如何用得如何下
得工夫中間看得一句常人固是做不得雖聖人尚
以此為病此須活看

寓

周兄問何事於仁必也聖乎曰必也聖乎是屬下文仁
通乎上下聖是行仁極致之地言博施濟衆之事何
止於仁必是行仁極致之人亦有不能盡如堯舜之
病諸是也必也聖乎蓋以起下

銖

問必也聖乎堯舜其猶病諸曰此兩句當連看蓋云便

是聖人也有做不得處且如堯舜雖曰比屋可封然
在朝亦有四凶之惡又如孔子設教從游者甚衆孔
子豈不欲人人至於聖賢之極然而人人亦各自皆
有病痛熹

亞夫問此章曰博施濟衆是無盡底地頭堯舜也做不
了蓋仁者之心雖無窮而仁者之事則有限自是無
可了之理若要就事上說便儘無下手處時舉

敬之問欲立立人欲達達人苟有此心便有博施濟衆

底功用曰博施濟衆是無了期底事故曰堯舜其猶病諸然若能果無私意已有此心仁則自心中流出來隨其所施之大小自可見矣

時舉

衆朋友說博施濟衆章先生曰仁以理言是箇徹頭徹尾底物事如一元之氣聖以地言也不是離了仁而為聖聖只是行仁到那極處仁便是這理聖便是充這理到極處不是仁上面更有箇聖而今有三等有聖人有賢人有衆人仁是通上下而言有聖人之仁有

賢人之仁有衆人之仁所以言通乎上下仁字直聖
字橫博施濟衆是做到極處功用如此義剛言此章
也是三節前面說仁之功用中間說仁之體後面說
仁之方曰是如此已欲立而立人已欲達而達人仁
者之存心常如此便未博施濟衆時這物事也自在
裏面叔器問此兩句也是帶下面說否曰此是兩截
如黃毅然適間說是三節極是夫仁者分明是喚起
說已欲立而立人已欲達而達人是仁者能如此若

是能近取譬則可以為仁之方子貢也是意思高遠

見得恁地却不知剗地尋不著

義剛

仁就心上說如一事仁也是仁如一理仁也是仁無一事不仁也是仁聖是就地位上說聖却是積累得到

這田地索性聖了

佐

子貢問博施濟衆章先生以何事於仁為一節以必也聖乎堯舜其猶病諸為一節其說以謂博施濟衆此固是仁然不是人人皆能做底事若必以聖人為能

之則堯舜亦嘗以此為病此非是言堯舜不能盡仁
道蓋勢有所不能爾人之所能者下二節事是也已
欲立便立人已欲達便達人此仁者之事也能近取
譬此為仁之方也今人便以已欲立已欲達為能近
取譬則誤矣蓋已欲立而立人已欲達而達人此不
待施諸已而後加諸人也能近取譬却是施諸已之
意故上二句直指仁者而言而下一句則止以為仁
之方誤

博施濟衆這箇是盡人之道極仁之功非聖人不能然

聖人亦有所不足在

仁固能博施濟衆然必得時得位方做得這事然堯舜雖得時

得位亦有不足

已欲立便立人已欲達便達人此仁者之

心自然如此不待安排不待勉強能近取譬則以已

之欲立譬人之欲立以已之欲達譬人之欲達然後

推已所欲以及於人使皆得其立皆得其達這便是

為仁之術

立是立得佳達是行得去

此是三節須逐節詳味看教

分明

林問已欲立而立人與已所不欲勿施於人地位如何
曰且看道理會地位作甚麼他高者自高低者自
低何須去比並問博施濟衆曰此是仁者事若把此
為仁則是中天下而立者方能如此便都無人做得
仁了所以言已欲立而立人使人人皆可盡得道理
必也聖乎當連下句說意在猶病上蓋此何但是仁
除是聖人方做得然堯舜猶病尚自做不徹需
夫仁者已欲立而立人已欲達而達人分明喚起仁者

字自是仁者之事若下面能近取譬方是由此而推將去故曰仁之方何事於仁必也聖乎不是聖大似仁仁只是一條正路聖是行到盡處欲立欲達是仁者之心如此能近取譬是學做仁底如此深淺不同仁通上下但克去己私復得天理便是仁何必博施而後為仁若必待如此則有終身不得仁者矣孔顏不得位不成做不得山林之士更無緣得仁也欲立欲達即絜矩之義子貢凡三問仁聖人三告之以推

已度物想得子貢高明於推已處有所未盡仁者欲立自然立人欲達自然達人如無加諸人更不待譬下截方言求仁之方蓋近取諸身以為譬

明作

問已欲立而立人已欲達而達人立達二字以事推之如何曰二者皆兼內外而言且如修德欲德有所成立做一件事亦欲成立如讀書要理會得透徹做事亦要做得行又曰立是安存底意思達是發用底意思

植

仁者已欲立而立人已欲達而達人與我不欲人之加諸我吾亦欲無加諸人意思一般學者須是強恕而

行熹

已欲立而立人已欲達而達人是以已及人仁之體也

能近取譬是推已及人仁之方也

明德

致道說仁者已欲立而立人已欲達而達人已纔要立便立別人已纔要達便達別人這更無甚著力下云能近取譬可謂仁之方這又是一意煞著比方安排

與仁者異已欲立而立人已欲達而達人與我不欲人加諸我吾亦欲無加諸人一般都是以已及物事能近取譬可謂仁之方與已所不欲勿施於人一般都是推已及物事曰然

賀孫

凡已之欲即以及人不待譬彼而後推之者仁也以我之不欲譬之而知其亦不欲者恕也

端蒙

問只仁之方亦可謂之仁否曰看得透時便是仁若循循做去到得至處回頭看前日所為亦喚做仁人

或問博施濟衆一章言子貢馳騫高遠不從低處做起故孔子教之從恕上求仁之方曰理亦是如此但語意有病且試說子貢何故揀這箇來問或云恐是子貢見孔子說仁多端又不曾許一箇人是仁故揀箇大底來說否曰然然而夫子答子貢曰已欲立而立人已欲達而達人至於答顏子則曰克已復禮為仁分明一箇仁說兩般諸公試說這兩般說是如何或曰恐克已復禮占得地位廣否曰固是包得盡須知

與那箇分別方得或曰一為心之德一為愛之理曰
是如此但只是一箇物事有時說這一面又有時說

那一面人但要認得是一箇物事

析錄云孔子說仁亦多有不同處向

顏子說則以克己為仁此處又以立人達人為仁一
自己上說一自上說須於這裏看得一般方可

如己欲立而立人已欲達而達人便有那克己復禮
底意思克己復禮便包那己欲立而立人已欲達而
達人底意思只要人自分別而已然此亦是因子貢
所問而說又問立字達字之義曰此是兼麓細說立

是自家有可立達是推將去聖人所謂立之斯立動之斯來綏之斯和亦是這箇意也凡事不出立與達而已謂如在此住得穩便是立如行便要到便是達如身要成立亦是立學要通達亦是達事事皆然又問博施濟衆如何分別曰博施是施之多施之厚濟衆是及之廣

熹

問仁以理言通乎上下曰一事之仁也是仁全體之仁也是仁仁及一家也是仁仁及一國也是仁仁及天

下也是仁只是仁及一家者是仁之小者仁及天下者是仁之大者如孔子稱管仲之仁亦是仁只是仁之功復問上是天下是小曰只是高低又曰這箇是兼愛而言如博施濟衆及後面說手足貫通處復問貫通處曰才被私意截了仁之理便不行

節○
集註

問仁通上下而言曰有聖人之仁有賢人之仁仁如酒好聖如酒熟問仁是全體如日月至焉乃是偏曰當其至時亦備問孟武伯問三子却說其才何意曰只

為未仁問管仲仁之功如何曰匡天下亦仁者之事
如趙韓王一言至今天下安謂韓王為仁則不可然
其所作乃仁者之功

學可

子上問仁通上下如何曰仁就處心處說一事上處心
如此亦是仁商三仁未必到聖人處然就這處亦謂
之仁博施濟衆何止於仁必聖人能之然堯舜尚自
有限量做不得仁者誠是不解做得此處病在求之
太遠已欲立而立人已欲達而達人只教他從近處

做薄

問仁通上下如何曰聖是地位仁是德問如此則一事上仁亦可謂之仁此之謂通上下其與全體之仁無乃不相似曰此一事純於仁故可謂之仁殷有三仁亦未見其全體只是於去就之際純乎天理故夫子

許之

學可

問仁通上下而言聖造其極而言否曰仁或是一事仁或是一處仁仁者如水有一杯水有一溪水有一江

水聖便是大海水

仁者已欲立而立人一章某當初也只做一統看後來
看上面說夫仁者下面說可謂仁之方却相反方分
作兩段說

或問博施濟衆一段程子作一統說先生作二段如何
曰某之說非異於程子蓋程子之說足以包某之說
程子之說如大屋一般某之說如在大屋之下分別
廳堂房室一般初無異也公且道子貢所問是何等

大氣象聖人却只如此說了如是為仁必須博施濟衆便使中天下而立定四海之民如堯舜也做不得何況華門圭竇之士聖人所以提起夫仁者已欲立而立人已欲達而達人正指仁之本體蓋已欲立則思處置他人也立已欲達則思處置他人也達放開眼目推廣心胸此是甚氣象如此安得不謂仁之本體若能近取譬者以我之欲立而知人之亦欲立以己之欲達而知人之亦欲達如此則止謂之仁之方

而已此為仁則同但已欲立而立人欲達而達人
是已到底能近取譬是未到底其次第如此彼子貢所問
是就事上說却不就心上說龜山云雖博施濟眾也
須自此始某甚善其說先生曰又某所說過底要諸
公有所省發則不枉了若只恁地聽過則無益也

朋錄

云說許多話曉得底自曉得
不曉得底是某自說話了

久之云如釋氏說如標

月指月雖不在指上亦欲隨指見月須恁地始得久
之云二三子以我為隱乎吾無隱乎爾吾無行而不

與二三子者是丘也又云天有四時春夏秋冬風雨
霜露無非教也地載神氣神氣風霆風霆流形庶物
露生無非教也久之又曰昔有人問話於一僧僧指
面前花示之曰是甚麼其人云花也僧云吾無隱乎
爾此不是他無見處但見說得來麓了孔子所謂吾
無隱乎爾者居鄉黨便恂恂在宗廟朝廷便便唯
謹與上大夫言便闔闔與下大夫言便侃侃自有許
多實事可見又曰程子說莊子說道體儘有妙處如

云在谷滿谷在坑滿坑不是他無見處只是說得來
作怪大抵莊老見得些影便將來作弄矜詫又曰黃
帝問於廣成子云云吾欲官陰陽以遂群生東坡注
云云是則是有此理如何便到這田地久之又云昔
在一山上坐看潮來凡溪澗小港中水皆如生蛇走
入無不通透甚好看識得時便是一貫底道理又曰
日月有明容光必照焉如日月雖些小孔竅無不照
見此好識取

祖道○賜錄云問博施濟衆程子全做
仁之體先生却就上面分別箇體用便

有用力處曰某說非破程子之說程子之說却兼得某說程說似渾淪一箇屋子某說如屋下分間架爾仁之方不是仁之體還是什麼物事今且看子貢之言與夫子之言如何地餘同而畧

林間一問博施濟衆章曰博施濟衆無下手處夫子故與之言仁夫仁者已欲立而立人已欲達而達人是能以已之所欲立者而立他人以已之所欲達者而達他人其所為出於自然此乃是仁之體能近取譬者近取諸身知已之欲立欲達則亦當知人之欲立欲達是乃求仁之方也伊川全舉此四句而結之曰

欲令如是觀仁可以得仁之體亦可以如此說與某之說初不相礙譬之於水江海是水一勺亦是水程先生之說譬之一片大屋某却是就下面分出廳堂房室其實一也又云子貢所問以事功而言於本體初無干涉故聖人舉此心之全體大用以告之以已之欲立者立人以已之欲達者達人以已及物無些私意如堯之克明俊德以親九族九族既睦平章百姓百姓昭明協和萬邦黎民於變時雍以至於欽若昊

天厯象日月星辰敬授人時道理都擁出來又曰如
周禮一書周公所以立下許多條貫皆是廣大心中
流出某自十五六時聞人說這道理知道如此好但
今日方識得如前日見人說鹽鹹今日食之方知是
鹹說糖甜今日食之方知是甜

人傑

問已欲立而立人已欲達而達人所謂以己及人能近
取譬近取諸身已所不欲勿施於人所謂推己及人
如何曰夫子分明說夫仁者則是言仁之道如此可

謂仁之方也已則是言求仁當如此若以為滾說則
既曰夫仁者矣不當以可謂仁之方結之也又問程
子說仁至難言至欲令如是觀仁可以得仁之體一
段却是滾說曰程子雖不曾分說然其意亦無害大
抵已欲立而立人已欲達而達人是自然工夫至於
能近取譬則是著力處所以不同

人傑

問已欲立而立人已欲達而達人注云於此可以得仁
之體是此處見得人與已相關甚切便是生意相貫

處否曰亦是只無私意理便流通然此處也是已對人說便恁地若只就自己說此又使不得蓋此是仁之發出處若未發之前只一念之私便不是仁

淳

問遺書中取醫家言仁又一段云醫家以不識痛癢為不仁人以不知覺不認義理為不仁又却從知覺上說曰覺是覺於理問與上蔡說同異曰異上蔡說覺纔見此心耳問南軒云上蔡說覺與佛家不同如何曰上蔡云自此心中流出與佛亦不大段異今說知

痛癢能知覺皆好只是說得第二節說得用須當看如何識痛癢血脉從何而出知覺從何而至某云若不究見原本却是不見理只說得氣曰然伊川言穀種之性一段最好

可學

明道云認得為己何所不至認得箇什麼夫人者己欲立便立人已欲達便達人此即仁之體也能近取譬則是推己之恕故曰可謂仁之方夫仁者與可謂仁之方正相對說明道云欲令如是觀仁可以得仁之

體先生再三舉似曰這處極好看仁又曰博施濟衆固仁之極功譬如東大洋海固是水但不必以東大洋海之水方為水只瓶中傾出來底亦便是水博施濟衆固是仁但那見孺子將入井時有怵惕惻隱之心亦便是仁此處最好看道夫

林安卿問仁者以天地萬物為一體此即人物初生時驗之可見人物均受天地之氣而生所以同一體如人兄弟異形而皆出父母胞胎所以皆當愛故推老

老之心則及人之老推幼幼之心則及人之幼惟仁者其心公溥實見此理故能以天地萬物為一體否曰不須問他從初時只今便是一體若必用從初說起則煞費思量矣猶之水然江河池沼溝渠皆是此水如以兩椀盛得水來不必教去尋討這一椀是那裏酌來那一椀是那裏酌來既都是水便是同體更何待尋問所從來如昨夜莊仲說人與萬物均受此氣均得此理所以皆當愛便是不如此愛字不在

同體上說自不屬同體事他那物事自是愛這箇是說那無所不愛了方能得同體若愛則是自然愛不是同體了方愛惟其同體所以無所不愛所以愛者以其有此心也所以無所不愛者以其同體也個

問明道曰醫書以手足痿痺為不仁云云可以得仁之體又曰能近取譬反身之謂也又曰博施濟衆非聖人不能何干仁事故特曰夫仁者立人達人能近取譬可謂仁之方也已使人求之自反便見得也雖然

聖人豈不盡仁然教人不得如此指煞或問堯舜其猶病諸伊川曰聖人之心何時而已又曰聖乃仁之成德謂仁為聖譬如雕木為龍木乃仁也龍乃聖也指木為龍可乎故博施濟衆乃聖人之事舉仁而言之則能近取譬是也謝氏曰博施濟衆亦仁之功用然仁之名不於此得也子貢直以聖為仁則非特不識仁併與聖而不識故夫子語之曰必也聖乎又舉仁之方也已欲立而立人已欲達而達人亦非仁也

仁之方所而已知方所斯可以知仁猶觀天地變化草木蕃斯可以知天地之心矣第二十九章凡八說

明道五說伊
川十七說

今從明道伊川謝氏之說大意與第一

說同故不錄明道第五說與伊川第二第十三說皆以恕為仁之方大意皆正但非解本文故不錄伊川第一說曰惟聖人能盡仁道然仁可通上下而言故曰何事於仁必也聖乎又第五說曰聖則無小大至於仁則兼上下小大而言之又第八說曰孔子見子

貢問得來事大故曰何止於仁必也聖乎蓋仁可以通上下言之聖則其極也又第十二說曰博施而能濟衆固仁也而仁不足以盡之故曰必也聖乎又第十四說曰仁在事不可以為聖此五說皆以何事於仁作何止於仁故以仁為有小大上下若既是有小大上下則以此章為子貢指其大與上者問之亦可也又何以答之曰何事於仁乎若聖人以仁為未足以盡博施濟衆則下又當別有說今乃論為仁之方

恐上下意不貫伊川五說只說得到其猶病諸處住則下文論仁之方不相接不如木龍之說却與明道之意合明道以何事於仁只作何干仁事則下文仁之方自相貫又功用字分明伊川第三說第四說第五第六說第十五說皆推說博施濟衆猶病即聖人之心何時而已之意故不錄伊川第九第十一說皆論仁之方與謝氏方所之說相類此章聖人恐子貢便指作仁看故但以爲若能由此而求之乃可以知


仁故曰仁之方伊川第十七說乃統說仁字大意與
明道第一說同故不錄橫渠曰必聖人之才能弘其
道恐本文無能弘其道之意范氏曰以大為小是以
仁為小聖為大也恐未穩餘說亦寬呂氏以博施為
仁濟衆為聖未當楊氏之說亦正但謂仁者何事於
博施濟衆又恐太過則明道所謂教人不得如此指
煞者但以仁聖須分說方見仁之體非以仁無與於
聖也尹氏與伊川餘說同故不辨曰何事於仁何止

於仁也必也聖乎堯舜其猶病諸此兩句相連讀言
雖聖人亦有所不能也已欲立而立人已欲達而達
人仁也能近取譬恕也

幹○
集義

問程子曰謂仁為聖譬猶雕木為龍木乃仁也龍乃聖
也指木為龍可乎此喻如何曰亦有理木可雕為龍
亦可雕而為狗此仁所以可通上下而言者也龍乃
物之貴者猶聖人為入倫之至也

必大



朱子語類卷三十三